



Tir Yimyim

www.tiryimim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimim@gmail.com



TAPAK 8

Niger tir inyaktsü Mohamed Bazoum shimogo



TAPAK 7

Aluyimertemi tractor lakh 40 amshia Parliament-i aotsü: Tikait

VOL. XVIII NO. 132 (ADOK 132) DIMAPUR

YANGTEPNÜ (THURSDAY) TSÜKLA (FEBRUARY) 25, 2021 ₹ 5.00

COVID-19 Nagaland: Nisung shinga dak meputet; 4 taneptsü angu

Kohima, February 24 (TYO): Tanü agi anogo asembuba Nagaland nung nisung ka dak danga COVID-19 meputet ajisüaka, nisung 4 taneptsü angu. "Bodbarnü nisung shinga dak COVID-19 aliba meputet. Külen, Kohima nung nisung 4 taneptsü angu" ta Health & Family Welfare Minister, S Pangnyu Phom-i metetdaksü. "Nagaland nung nisung 12,192 dak putetba nungi 11,941 taneptsü nguogo aser tang parnok nisung

8 anepaludar" ta Health & Family Welfare Director, Dr Denis Hangsing-i ashi. Nagaland nung taneptsü angurji 97.94% lir, ta paisa shisem. "Nagaland nung COVID-19 alitsü akok ta temolung melemi bilemba sample 1,29,711 tendangogo. RT-PCR ajanga sample 74,658, TrueNat ajanga 37,327 aser Rapid Antigen Test ajanga 17,726 tendang" ta Dr Hangsing-isa metetdaksü.

Medical College Mon lung azungba sentong renemogo

Dimapur, February 24 (TYO): February 26, 2021 nü Union Minister for Health and Family Welfare, Dr. Harsh Vardhan-i Medical College Mon indang lung azüngsütsü. Iba sentong nung mendenji Mon Deputy Commissioner Thavaseelan K, IAS asütsü, Health & Family Welfare Minister S. Pangnyu Phom-i tesentepertem pelaa agizüksü aser Principal Secretary, Health & Family Welfare, Amardeep S Bhatia, IAS-i mapatong indang osang lemsateptsü. Sentong nungsa Union

Minister of Health & Family Welfare, Dr. Harsh Vardhan, Nagaland Chief Minister Neiphiu Rio, Member of Parliament (Lok Sabha) Tokheho Yephthomi, Konyak Union President aser ENPO President nungertemia o jembitsü. KBBB Executive Secretary, Rev. M. Chemyuh Konyak-i sentong atema temoatsü meshia sarasademtsü aser Social Welfare, Home Guards & Civil Defence Advisor Noke Wangnao-i anküp tepela o jembitsü.

Assam ajunga 'disturbed area' ta sangoktsür

Guwahati, February 24 (Agencies): Taküm April-May tsüngda state assembly election agitsü lia Assam Governor Jagdish Mukhi-i Assam state ajunga 'disturbed area' ta sangoktsüogo. February 27, 2021 nungi tenzüker ita trok atema Assam ya 'disturbed area' ka züngshitsü, ta tanü state sorkari sangdong ka nung ashi. "Armed Forces (Special Powers) Act, 1958 nung Section 3 kübok tashi agüja aliba ama Assam Governor-i iba osang metetdaksüogo ta sorkarisa ashi. Yaküm August 28 nü Assam nung ita trok atema 'disturbed

area' sangokja liasü. Northeast nung sepaitem amakba aser Assam kübok tesem balala nung, talisa Bodoland Territorial Region (BTR) nung prangpong-injangtem ngutetba ajanga iba telemtetba agi ta sorkar osang ajanga ashi. Karbi Anglong nungi telungpur 1040-i yashi Assam chief minister Sarbananda Sonowal matsüngdang temai adokba sülen anogo ka lir iba telemtetba agiogo. Tang ya Northeast kübok Assam, Nagaland aser Manipur o Arunachal Pradesh kübok tesem kar nung AFSPA ozüng benoka lir.

COVID-19 tali putetba state 10-i multidisciplinary teams yoker

New Delhi, February 24 (Agencies): Union Health Ministry-i state 10 dangi high-level multi-disciplinary teloktem yokogo. Teshimtet telok jagi state aser UT ketdangsurtem den coronavirus kanga putetba kulitem yaritepa bushitsü. Maharashtra, Kerala, Chhattisgarh, Madhya Pradesh, Gujarat, Punjab, Karnataka, Tamil Nadu, West Bengal aser Jammu & Kashmir nung tawa COVID-

19 kanga putetba azioktsü aser COVID response & management maparen nung yariteptsü atema Union Health Ministry-i züngsem asemagi akümba multidisciplinary teams yoktsü. "Centre-i Maharashtra, Kerala, Chhattisgarh, Madhya Pradesh, Gujarat, Punjab aser Union Territory of Jammu and Kashmir dangi shidi züluogo. Item state aser UT nung anogoshia COVID timba puteta arur" ta Ministry sangdong ka nung ashi.



Bodbarnü Mon district kübok Tobu jila nung Nagaland Chief Minister Neiphiu Rio-i Eastern Nagaland Public Organisation (ENPO) tenteter küm 25 jubilee mong indang nüngo kaket sayatsüdang agiba noksa angur. (Mon, February 24)

Feb 26 nü Dimapur nung shishilembartemi mokdangtsü

Dimapur, February 24 (TYO): Dimapur Chamber of Commerce and Industry (DCCI)-i February 26, 2021 nü Bharat Vyapar Bandh nung shilem agitsü osang metetdaksüogo. "Confederation of All India Traders (CAIT)-i mepishiba aser Confederation of Nagaland Chambers of Commerce and Industry (CNCCI)-i telemtetba agiba ama DCCI-ia linük ajunga nung shishilembaba mokdangba nung adentsü" ta Bodbarnü Tir,

Akashe Zhimomi-i sangdong ka nung metetdaksüogo. DCCI-isa Dimapur nung shishilembar ajaki February 26, 2021 anepdang 8:00 ako nungi nikongdang 4:00 ako tashi shibangtsü tetuyuba agütsüogo. Iba mokdang atema DCCI-i volunteers mapa lezmüksütsü aser iba anogomong nung ozüng alema mapa inyakertertemi timtem magütsütsü atema ozüng amertemi tenük yoktsü mepishia

metetdaksüogo. "2017 küm India nung Goods and Services Tax (GST) inyakyim tenzüka ya tax inyakyim tasak lir. Linük nung shishilembartemi iba inyakyim atem khuret aika ajurur. Anungji Dimapur nung shishilembabaren nung shilem agir ajak ajanzüksü atema shishilembartemi mokdangtsü tuyuba sülen anidaksü mepishir" ta Tir Akashe Zhimomi-isa metetdaksü.

DoNER Minister-i bamboo treatment plant lapoktsü

Guwahati, February 24 (Agencies): Bodbarnü Union DoNER minister Dr. Jitendra Singh-i Guwahati anasa bamboo treatment plant lapoktsüogo. Iba plant ya National Bamboo Mission (NBM) aser North Eastern Council (NEC)-i teyari agüja North East Cane and Bamboo Development Council (NECBDC) nung lapok. Sentong nung North Eastern Council züngsem Air Marshal Anjan Kumar Gogoi, NECBDC

managing director Dr Shailendra Chaudhari aser NEC advisor (BIT) R Lalrodingi nungertem aden. Union DoNER minister Singh-i NEC, NECBDC aser NECBDC nungi Dr Chaudhari nem tenüngsang agütsü. Centre-i India nung bamboo industry ajungkettsü aser mapa jenti adokdaksütsü atema iba mapa ya inyaker, ta paisa metetdaksü. Iba mapatong ajanga Northeast nung lisopur lanurtemi

treatment plants yanglutsü ajungmesotsü aser iba jagi aou lu ayimertem shishilembaba maparen tajungba kümdaksütsü. Bamboo treatment plant ajanga bamboo-entrepreneurs-i 200% tajanzük angutsü. Assam nung iba technology benokba ajanga küm shia artisans, entrepreneurs, farmers, field functionaries, students, architects, scientists aser professionals 500 tema ajanzüksü imlar.

March 1 nungi Covid vaccine agitsüpur indang temetetsü

New Delhi, February 24 (Agencies): Bodbarnü Centre sorkari March 1, 2021 nungi vaccine agütsüba tanabuba shilem tenzüksü osang metetdaksüogo. Iba shilem nung arishi küm 60 ser temapur aser ano temang nung timtem alir arishi küm 45 ser temapur nem Covid vaccine agütsütsü. Iba telemsa nung nisung crore 27 shi adentsü akok ta Centre-i ashi. Iba telemsa nung adenertem asoshi Centre-i sorkar mozü ki 10,000 shi ka nung vaccine angati agütsütsü telemtetba agiogo. Ajisüaka, nijia mozü kitem nung

vaccine atema sen agütsütsü. Health Ministry-i taruba anogo ishika tsüngda nija mozü kitem nung vaccine indang jenjang metetdaksütsü. India nung Covid vaccine agiba tanabuba shilem ya self-registration inyakyim nung asütsü. Iba atema Co-win app 2.0 download asütsüla aser idakji tenüng register asütsü. Arishi küm indang kuli agütsütsü atema nisung kati election ID card mesüra Aadhaar amshitsü akok. Co-win app nung register asüdsang nisung ka indang Aadhaar aser electoral roll mashii ka nungi data agitsü.

Centre-i temang nung timtem aketerrem indang osang ano tejangja memetetdaksü saka iba telemsa nung cancer, kidney failure, cardiovascular, diabetes, aser hypertension alirtem adentsü akok. Nisung kati agütsüba arishi küm aser data nung aliba kasa ta Co-win app ajanga kuli agütsüba sülen, iba app ajanga vaccination centres aser geo-coordinates sayutsü. Iba nungi nisung kati vaccine agitsüba tesem aser anogo shimtsü akok. Ano, state ka indang electoral roll nung tenüng alirtemi tanga state ka nung vaccine agitettsü.

Nagaland DGP-i police dang COVID-19 mozü agitsü ajungshi



DGP Nagaland nem February 24, 2021 nü COVID-19 mozü dose mezüngbuba agütsüba mapang tangokba noksa ka yangi angur.

Dimapur, Tsüklai/February 24 (TYO): PHQ Kohima nung February 24, 2021 nü COVID-19 vaccination aser sensitization sentong ka ayongzüka liasü. Yangji COVID-19 mozü agütsüba mapang Director General of Police, Nagaland T.J Longkumer, IPS nem mezüng dose agüja liasü. Iba mapang police 100 shi nem mozü ya agüja liasü. Iba sentong nung jembiba mapang DGP Nagaland ajanga

police ajunga dang mozü ya agitsü ajungshi, kechiaser police mapa aser yimya agi COVID-19 tashidak nungi kumzüka alitsü asoshi renema alitsü nungdaker. Iba vaccination sentong ya Limasunep Jamir, IPS, IGP (Range) ajanga ayongzüka liasü aser police department nung Nodal Officer for COVID 19, Dr. John Khuvung, RMO ajanga mozü ya agütsü.

CMO Dr. Vezokholu aser Dy. CMO aser DIO Dr. Rupert Peseyie nati conference hall, PI IQ nung police nem iba tashidak aser mozü indang shisa lemsatapa liasü, ta SP Crime & PRO, PGQ ajanga sangdong ka nung ashi. Iba sentong nung R. Vikram Ezung, Asst. Inspector General of Police (OPS) menden liasü.

Kohima nung COVID-19 mozü indang workshop ka agi

Dimapur, Tsüklai/February 24 (TYO): Lokti tentet aser arogo balala den COVID-19 vaccination consultation workshop ka Conference Hall, Medical Directorate, Kohima nung February 24, 2021 nü agia liasü.

Iba sentong nung Principal Director, Health & Family Welfare, Dr. Kevichusa-i jembiba mapang, COVID-19 mozü ajanga tashidak wara tatem kati arutsü asoshi maongka agütsür, ta ashi.

Akhi ama asenok takum liyonga aotsü asoshi mozü ya lenmang tajungtiba lir, anungji health worker ajungai iba mozü ya agitsüla, kechiaser February 25 ya anogo tatem

asütsü, ta pai ashi.

Pai sentong nung adenerkem dang mozü agitsü ajungmesor ka asütsü aser kasa mapang COVID-19 mozü agütsüba maparen takok ngua inyaktettsü asoshi temaba jenjangi ajungketba nung tongti shilem agir ka asütsü ajungshia liasü.

Ajak asoshi mozü tajung yanglua lir, saka mapang lemsar agütsütsü. Taruba phase nung arishi küm 50 nungi tema aser arishi küm 50 tekübok tashidak balala agi shiranga alir nem Government of India totuyuba nung ajemdaker mozü ya agütsütsü, ta pai ashi.

Iba sentong ayongzüka teratet ya Dr Longri Kichu-i ashi aser state immunization officer, DHFW Dr Ritu Thurr ajanga COVID-19 mozü ya kota tongtipang, ta asüba onük nung jembia liasü.

Sentong nung COVID-19 status indang osang State Nodal Officer, IDSP, Dr. Nyan Kikon-i agütsü aser SMO, WHO, Dr Sheila Longkumer ajanga vaccination drive indang sentongtem metetdaksü.

Maneni Dr Temsu Longchar, SPO, UNDP ajanga COWIN portal indang jembia aser UNICEF consultant aser IEC team züngsemtem den sensaksema mapang agia liasü.

Chumukedima Block kübok Anganwadi worker training agi



Dimapur, Tsüklai/February 24 (TYO): Chumukedima Block kübok Anganwadi worker 20 nem anogo ka training February 24, 2021 nü agüja liasü. Iba training ya Prodigals' Home kübok Community Mental Health Programme (CMHP) ajanga ayongzüka Mental Health, Mental Illness, Intellectual Disability aser Epilepsy for consequent identification nung ajemdaker agüja liasü.

Iba sentong nung shisalen sayur Tiarenla, Yeshito, Kedingunuo, Toshiwapang aser K. Sani nungertemi Mental Health concept aser

Schizophrenia, Bipolar Disorder, danga psychotic disorders, Depression, Anxiety, Obsessive Compulsive Disorder, Phobias, etc, Convulsive Epilepsy aser Intellectual Disability amala tekolok nung timtemba onüktem nung ajemdaker jembia liasü, shirnok CMHP team züngsemtem lir.

Anganwadi worker temi nüburttem den külemi maparen balala nung yariteper, anungji parnoki item timtem metetjemtsü aser jangjateta anepalutsü atema CMHP project dangi yoktsü

asoshi iba training ya agütsü.

CMHP Project yagi item subject tem nung shilem agia item timtem aliba nisungtem nem teyari agütsür. Parnoki Guwahati nungi Consultant Psychiatrist ka aser CIHSR, Dimapur nungi Clinical Psychologist teyari nung mozü agütsür aser timtem anepalur.

CMHP ya Azim Premji Philanthropic Initiatives, Bangalore ajanga tentet aser technical tsütsü Ashadeep, Guwahati ajanga yaria tang Chumukedima Block kübok yimtsüng aser ward tem nung maparen balala inyaker.

Ao Kaketshir Telungjem Kohima tirttem senden ayonger

Dimapur, Tsüklai/February 24 (TYO): Ao Kaketshir Telungjem Kohima (AKTK) mezüngbuba Presidential Meeting 2021 ya February 27, 2021 anepdang 10:00 ako nungi Paramedical colony, Kohima nung AKTK kimen kidang amentsü, ta AKTK tir

Imodangba Imchen aser tongti zülur Lanuyanger Jamir nati sangdong ka ajanga ashi.

Anungji AKTK indang Federating Units aser Sub-ordinate Units ajunga dang iba senden nung arua adentsü metetdaksür, ta kasa sangdong ajanga ashi.

Security Forces-i Dimapur nung NSCN (U) züngsem ka apu

Dimapur, Tsüklai/February 24 (TYO): Security Forces temi police den lungjemer February 22, 2021 nü Padumpukhuri, Dimapur anasa operation ka agiba mapang NSCN (U) züngsem ka apu.

Osang tejangja kar nung ajemdaker Spear Corps nungi Security Forces den police nungi teshimtet nübu kar dener

operation ka agiba mapang NSCN (U) züngsem ka apu aser pa ket nungi point 32mm pistol ka, point 32mm injang ter aser Codeine aket mozü bottle 75 nguteta liasü.

Iba ken o maneni bushisüngdangtsü atema pua alisang den pa ket nungi ngutetba osettem ya East Police Station, Dimapur nem amoktsüogo.

Assam Rifles temi Peren nung injang apu



Dimapur, Tsüklai/February 24 (TYO): Assam Rifles temi police nungi teshimtet nübutem den lungjemer February 22, 2021 nü Peren district kübok New Market, Jalukie nung operation ka agiba mapang prangbong injang ayoker ka pua pa ket nungi ozüng alema ayokba injang aika nguteta liasü.

Osang tejangja angazükba nung ajemdaker Assam Rifles aser police temi operation agiba

mapang injang ayoker apu aser pa ket nungi point 22mm injang 40, 12 Bore indang 87, shotgun pellets seret 25, air rifle pellets packet 114, recoil spring 22 aser sale receipt book pezü nguteta liasü.

Iba ken o maneni asüngdangyatsü atema pua alisang den pa ket nungi ngutetba oset ya Jalukie Police Station nem agütsüogo, ta sangdong ka ajanga ashi.

February 27 nungi India Toy Fair tenzüktsü

Dimapur, Tsüklai/February 24 (TYO): Ato Kilonser-i India ya Toy Industry atema global hub ka kumdaüksütsü nükla aliba den lirumedema Government of India ajanga February 27, 2021 nungi March 2, 2021 tashi virtual platform nung 'The India Toy Fair, 2021' ayongzüksü.

Iba India Toy Fair nung Virtual Exhibition, state sorkartemi Webinars agütsüba, kazütsü nung amendaker shisatsü angazükba nung mongintemi onük balala nung panel discussions/webinars, craft demonstration, tetoktepa, quiz, virtual tours aser oset sayaba sentongtem dena alitsü.

Anungji School ajunga indang tekolaktem dang kaketshir, tsürabur aser tesayurtem <https://theindiatoyfair.in/> nung tenüng zülüoka virtual India Toy Fair nung February 27 nungi March 2, 2021 anogotem adentsü ajungshitsü metetdaksüogo.

Maneni school tem nunga

kaketshirtem virtual India Toy Fair 2021 atema mapang kar agitettsü aser craftwork aser quiz amala nung shilem agidaksütsü aser tesayurtema toy pedagogy, toy-based education amala webinar nung adentsü ajungshir. Internet live stream malidak school temi TV anepalua Swayam Prabha eVidya channel nung India Toy Fair sentong live sayuba reprangtsü akok.

School temi Toy-based group project tem inyaktüsü akok aser Ek Bharat Shrestha Bharat paired State/UT den sendakteptsü.

Class takdang nung toys/games/puzzles/puppets/activities/board games/electronic games/etc amshia angazükba indang video minute ka nungi ana tashi yanglur MyGov indang site: <https://www.mygov.in/task/my-favorite-indian-toy-video-contest/?target=inapp&type=task&nid=300431> nung post sütsütsü akok.



Sikkim BJP President DB Chauhan-i yashi New Delhi nung Minister of State (MoS) in charge of Home, G. Kishan Reddy den ajurutepdang agiba noksa angur. Iba mapang DB Chauhan-i MoS Reddy nem memorandum ka agütsü aser iba nung Sikkim nung kin kar nem tribal status aser Limboo o Tamang nunger atema Assembly menden lemkütsütsü takhangba onüktem dena lir.

Tripura High Court-i SSA tesayurtem regularize asütsü tuyur

Agartala, February 24 (Agencies): Mongulbarnü Tripura High Court-i State sorkar dang state nung Sarbya Sikhya Abhiyan (SSA) kübok inyakba tesayur ajak regularize asütsü tetuyuba agütsüogo.

SSA tesayurtem tenüing nung senior lawyer Purushottom Roy Barman-i ashiba agi Tripura High Court-i iba oshidang agütsüba ajnaga SSA kübok primary aser upper primary tesayur 4000 tema ajangzüktsü.

Tripura High Court nung senior advocate tem-Purushottom Roy Barman, Soumik Deb aser Samarjit

Bhattacharjee nungeri SSA tesayurtem atema jembitsü.

Iba ken o ya Tripura High Court nung nisung anati akümba bench-i angadang. Iba bench nung Chief Justice AA Qureshi aser Justice SG Chattopadhyay na dena lir.

"Tripura sorkari küm pungu mapa inyakba SSA tesayurtem mapa nung regularize asütsüla" ta Tripura High Court-i obendang agütsü.

SSA tesayurtemi Tripura High Court indang obendang pelashishia agizükogo.

2017 küm SSA tesayurtemi parnok mapa regularize süjang ta takhangba agüja anogo 7

lumia lungkak aita liasü.

Iba mapangji Tripura nung BJP ya opposition nung liasü aser parnoki 2018 Assembly elections nung takok ngudaktsüra SSA tesayurtem mapa regularize sütsütsü ta nangzük.

Ajisüaka, Tripura nung sorkar akümba sülen BJP-i parnoki nangzükba ama meinyak.

Sorkar akümba sülen BJP-i SSA tesayurtemji Centre sorkar mapa inyaktertem anungji state sorkari regularize mesütetsü ta ashi. BJP-isa item tesayurtem indang 'quality' atema ashishitep.

BJP-IPFT tesentaktep nung mepetmesü adoka lir

Agartala, February 24 (Agencies): Tripura nung BJP aser IPFT tsüingda mangatettep tulu ka adokogo.

Tripura Tribal Areas Autonomous District Council (TTAADC) election nung Indigenous People's Front of Tripura (IPFT)-i Pradyot Deb Barman-er The Indigenous Progressive Regional Alliance (TIPRA) den yariteptsü ta sangdongba sülen anogo ishika ka lir Mongulbarnü IPFT aser BJP senden ka amentsüba liasü saka athi.

Tripura sorkar nung yariteper BJP aser IPFT tsüingda sendenji Deputy Chief Minister Jishnu Deb Varman'er kidang amentsüba liasü. Ajisüaka, IPFT tongti lennirtemi parnok kanga mazüing ta shia senden nung adentsü memolung.

BJP aser IPFT lennirtem tsüingda ano February 26

mesüra February 27 nung senden ka amentsü sentong renemogo.

Külen, BJP lennirtem den senden amentsü memolungba sülen IPFT president NC Deb Barma aser secretary Mevar Kumar Jamatia nati anir lennirtemi Tripura Chuba jabaso aser TIPRA chairperson Pradyot Kishore Deb Barman den ajurutep.

Pradyot Deb Barman-i IPFT president NC Deb Barma'er kidangi ao aser tena ghonda shi senden amen.

Iba mapang tenati tongtipang onük aika lemsatep ta osang ajanga ashi.

BJP-IPFT teloktep nung mepetmesü adokba atema BJP MP Rebati Tripura-i IPFT lennirtem aitsü.

"IPFT lennirtemi TIPRA den tesentaktep yangluba atema onok dang kecha mashi. Iba ya

yimya tamajung. State sorkar nung BJP den yaritepba telok kati kodaser tanga party ka den tesentaktep yanglur?" ta Rebati Tripura-i ashi.

BJP-IPFT teloktep nung mepetmesü adoka lir ta jembiba atema IPFT assistant general secretary Mangal Debbarma-i ashiba agi "IPFT-i BJP den tesentaktep junga dang lir."

"Tesüiba küm ka onoki BJP central leadership den ADC election tebilemtsü aser lisopurtem renlokdaaktsütsü atema jembiyonga arur. Saka BJP central leadership aser State BJP-i onoki mepishiba atema melangzür" ta Mangal Debbarma-i metetdaksü.

"Onoki tanga party shinga den tesentaktep mayutsü ta onoki BJP den kecha nangzüktepa mali" ta Debbarma-i BJP MP Tripura indang o meyiptsü.

Songbijit-i PDCK temai adokba osang metetdaksü

Guwahati, February 24 (Agencies): People's Democratic Council of Karbi Longri (PDCK) tanishir Ingti Kathar Songbijit-i temai adokba sülen Mongulbarnü ang ola adokogo.

Yashi Songbijit-i Assam chief minister Sarbananda Sonowal tsüingdang prangpong-injang bener arua agütsü.

Guwahati nung agiba sentong nung telungpur 1,040-i prangpong 338 bener arua temai adok.

"Nü borte m ajangzükdaaktsütsü atema onoki temai adok. India sorkari onok pusemtsü aser akhangbatem inyaktütsü imlar" ta Songbijit-i yashi ashi.

"Ni temai adokba ya tayongzükba tulu ka lir kechiyong ni civilian ka ama balaka melidang. Ni akokba tashi kü taküm liyonga aotsü merangtsü" ta Ingti Kathar Songbijit-isa ashi.

Temai adokba telungpurtem indang tebilemtsütem koktettsü atema Assam nungertemi onok yaritsü mepishir, ta paisa shisem.

"Union Home Minister Amit Shah-i Assam semdangdang

onoki treaty ka nung sign asütsü akok. Mezüing ceasefire nung sign asütsü aser iba sülen onoki akhangba onüktem benoktsü" ta Songbijit-isa metetdaksü.

Songbijit ya taoba mapang NDFB (S) indang Commander-in-Chief liasü saka Saoraigwra-i pa melenzük. Iba sülen pai Karbi nunger atema linük balaka kümtetsü tangatetba nung People's Democratic Council of Karbi Longri tentet.

Ajisüaka, Centre-i parnok anema mapa inyaka aruba sülen PDCK züngsem ajak yashi temai adok. Taoba mapang PDCK-i Centre den 'Unilateral Ceasefire' aliba osang metetdakja liasü.

PDCK, Dima Halam Daogah (DHD) aser Karbi Peoples' Liberation Tigers (KPLT) dena telungpur telok 7-i temai adokba ajanga Assam nung hill district asem- Karbi Anglong, West Karbi Anglong aser Dima Hasao nung telungpur maparen nung tetsükdaksü tulu ka ajurutsü. Külen, osang kar ajanga Songbijit-i Assam assembly election nung tokteptsü atema temai adok ta ashir.

Assam Congress-i Gamosa lakh 1 tema bendenogo



Guwahati, February 24 (Agencies): Assam Congress-i tang tashi nung state nung kilen shia sema senzüdang CAA anema Gamosa lakh 1 tema bendenogo.

"Assam nunger khuret angateta Congress züngsemtemi kilen shia sema aodang gamosa lakh 1 tema bendenogo. Anogo ishika tsüingda nung nübertemi Gamosa nung parnok tebilemba metetdaksüogo aser Congress lennirtem ket nung agütsüogo. BJP sorkari benokba Citizenship Amendment Act (CAA) parnoki magizükter" ta Bodbarnü Congress sangdong ka nung ashi.

Nübertemi CAA anema tezülubatem dener agütsüba Gamosa tem ya Guwahati nung yanglutsü aliba Anti-CAA-Martyrs Memorial nung ayutsü. Assam nung sorkar kümra Congress-i iba Memorial yanglutsü ta nangzükogo.

Assam nungeri Assam Congress ajanga CAA anema bilemba lemsatepba atema pelar ta Congress lennirtemi ashi.

"Onoki Assam longjemtsü aser azükarutsü atema teimla mesama lir, kechiyong nübertemi telemsa adokdaktür anema noktaker. Anogo ishika tsüingda onoki gamosa lakh 1 tema bendenogo aser item nung CAA anema zülua lir" ta Assam Congress president Ripun Bora-

i ashi. "Gamosa lakh 1 ya State nung nübertemi Assam Congress asoshi bilemtsüba kuli lir. CAA ya Assam atema majung ta ser onoki inyakba mapa nung nübertemi pusema nungitba atema pelar" ta Lok Sabha MP Gaurav Gogoi-ia metetdaksü.

"Gamosa lakh 1 ser tema ajanga Assamese nunger tashi aser tasü itta noktakba sayur. Hao, Assam nung CAA mapa küma meinyaktetsü. CAA anema züluba gamosa tem agüjangma aser asenoki telemsa adokdaktürtem dang salem shidi" ta Assam Minister Rakibul Hussain-ia ashi.

"Assam Congress 'My Anti-CAA Gamosa' pusema nungitba atema kanga pelar. Onoki gamosa lakh 1 tema bendenogo. Nenok ajak putiotsü nung tongtipang shilem ka ka kümogo aser asenok külemi CAA agientsü" ta Lok Sabha MP Pradyut Bordoloi-ia metetdaksü.

"Anogo ishika tsüingda CAA anema zülur Gamosa lakh 1 tema bendenba ajanga nübertemi Assam Congress indang 'My Anti-CAA Gamosa' campaign pusema nungitba sayur. Asenoki timba bendentsü merangdi aser BJP'er CAA agiendi" ta Assam Congress Legislature Party leader, Debabrata Saikia-ia ashi.



Mizoram kübok Aizawl nung Assam Rifles sepaitem aser Mizoram Excise and Narcotics Department ketdangsürtemi Rs 57 lakh alangba heroin apu. Parnoki Bawngkawn Shalom tesem mita aodang heroin gram 128 apu aser iba dak sendakba nung nisung 2 pua lir. (Aizawl, February 24)



TIR YIMYIM

YIMOBILEM (EDITORIAL)

DIMAPUR YANGTEPNÜ, TSÜKLAI (FEBRUARY) 25, 2021

PLASTIC MAMSHI MAREMER

Alima ajunga nung tzü mopong memenendaktsütsü asoshi akok tashi plastic mamshitsü özüng azüngba aser ajungshitepba den tsüngkang medema, Nagaland nunga Nagaland government-i tamalen khen dang amshir endoktsüsa plastic agi yangluba osettem kecha mamshitsü asoshi özüng lateta lir. Iba özüng latetba sülen, talisa government-i ayongzükba sentong aser lokti benjongtem nung nisung ajaki tashi angaa khen dang jemer endoktsü yangluba plastic tzü bottle, plastic auso aser marok kenyongi dang mamshii aruogo. Aji oda, kaketreju aser mapa inyakba tesem aika plastic mamshiba tesem kümdaktsüogo. Ibayongji, nisung aikati shishilembadaki aodanga juli tulu bener aotsü yimya sübaya liasü, kechiyong dokan nung akhidang amato oset ajak enoker ayongayonga aotsüsa polythene yangku magütsü anena adok aser kimalen jajadang plastic bottle nung aliba tzü alia majemtsüsa tzü bottle bener jajatsü tenzük. Item ajakji akok tashi plastic agi yangluba osettem mamshii alima kümzüksü asoshi inyakba mapatem liasü. Ajisüaka, ajungbena ka Covid-19 tashidak wara agi asenoka tonga adok aser maparen aika nung akhi inyakyim ama meinyaktetsüsa küma adok. Idangji inyakyim tezübaba apia shishilembadak tanaben polythene bag amshitsü tenzük aser kiyimba aser asüama benjong mapang nunga nisungtemi akhi ama plastic tzü bottle tila aser plastic auso aser marok amshitsü tenzük. Aji oda, tesasatsüka government-i ayongba sentongtem nunga plastic tzü bottle aser plastic auso aser marok amshiba angur. Ibaji özüng yanglurtemi özüng raksaba mapa asütsü. Alima nung plastic mamshitsü özüng azüngba ya kar ajungtsü aser ajangzüksü atema azüngba masü saka alijak nung alir ajak temang nung timmedemi tzü mopong temerük agia anema alitsü asoshi lir, anungji plastic mamshitsü nungdakba mapa yabo özüng lateta makayonga tangatetba agi senso kati inyaktsüba mapa ka lir. Tamalen, asenok nem tangatetba magütsü ser taolen nungdak ajak nung plastic amshidaktsüba agi, tanübo tesem mashi ka nung ali telonglen tupoka reprangdangra ali tema nungi telongi tzü yimpoka maitsüsa plastic agi sünga angutsü, kechiyong plastic yabo ali küma aotsüba oset ka masü. Aji oda, ali telonglenji dang masü saka asen lima ayongtem ajak plastic agi süngogo. Item ayongtem nung jagi, asenoki tangatetba tajung agi alima tzü mopong meima, polythene bag aser tanga plastic osettem ajak bendena merüktetsüsüla, kechiyong tzü mopong meimbaji asensasa asen meimba den kasa lir. Atangji, plastic medenibo mapa kecha ayongayong meinyakteti plastic osettem dak dang metaloker aliba tensa tia ka nung, plastic mamshitsü özüng agütsüba agi plastic melena kechi amshitsü ta asüba tasüngdangba liasü. Iba tasüngdangbaji asenok lisopur lanurtem aikati kanga junga langzüteta, joko kari kaket agi shishilembadak amshitsü yangku (paper bags) aser kari auso marok ta yanglutsü tenzüka lir. Alima nung ya timtem aru shia ano temoatsüa lir, aji oda kar asoshi takoksa arubaji, shisa kara, kar asoshi takoksa asür, anungji plastic ayokertem takoksa angubaji kaket aser süngolemba agi yangluba osettem ayoker asoshi tajangzük aküm. Atangji, Covid-19 tashidak wara ali dangbo plastic amshiyonga kecha masü ta masü, plastic mamshitsübaji tangsa tenungdakba küma özüng amertemi alima kümzüksü asoshi kanga nendaka inyaktsüla. Alima tzü mopong memenendaktsüi kümzüksüba maparen nung asenok senso shiai shilem tilala kakabo agitsüla. Item shilemtem rongnungji plastic tzü bottle mamshitsü atema teti kidang nungi tzü pongdang nung tzü zür abenba, jangotsü aser aonsutsü alii aodang poythene bag mamshitsüsa sü yangku tulu arürer amshiba, lokti chiyongba sentong nung kaket aser süngolemba agi yangluba auso aser marok dang amshiba mapatem asütsü. Aji oda, kodamasüba agi plastic agi yangluba tzü aser totzü bottle aser polythene bags amshitsüsa kümra, itemji khen dang mamshii aiben amshitsüsa shidokli yuli ta shisaa mao tashi amshitsüla.

OLEMSABANG

AO OSHI SAYUYIM

~ P. Renthly Jamir

(Yashi adok nungi...)

46. Nüchinülem - Matamabensa = Tabensa nüchi. Tera matu, teji ka mait.
47. Nülanüshia - Apetajia = Chir mechima talupo. Metsü menakpet ama chipeta achi.
48. Ongben - Tazüla = Tasen/tang onzükba süngjang. Tejen/ongzüker khenpika.
49. Onglang - Tembi = Tereprangtsü mazü tar talang. Tar onsara tatsü.
50. Onteta - Tajemzük = Marba/tuluba. Seplangnungba/tilaba.
51. Pangtong - Amsanglep = Teyrira nashi/jang. Tekongra/tematsük.
52. Petpasüa - Terumajen = Aroarua putepa alir. Mepetmesüa jangramatem.
53. Sanchanu - Mojing = Ajemalu nisung, onsara ajung. Atimejia majung.
54. Senposenya - Mokongmeya = Tengunüsen, aginüa. Mesenmeto, senarua masü.
55. Sentimenti - Zürepzura = Tongtibang jenjang tulu. Jenjang tila, tezüpa oset.
56. Sentsüketer - Nüsa = Jenjang aketer tular/takar. Kecha masüba nisung.
57. Shitibener - Chikong mangur = Takar tetsüti. Lenimao sensakpu.
58. Shitimenti - Nükep = Tashi tulu süng lung ajak akoker. Anko majung takoktsü maka.
59. Süliali - Züpazura = Jenjang tasak agi ali. Langlaga ali, jenjang tezüpa.
60. Süreprep - Kiyaluya = Mapa ajak nung tekara. Angko majung/tanungtalu.
61. Tamahar - Ankeper = Tamapur, tama jajar alu talen. Tesüpur, yimsükeper.
62. Tamasür - Tipulir = Akümlir. Asür lima alir.
63. Tangratangrar - Ranua = Jangjajangja angur. Lia nungi tera junga mesüi angur.
64. Tanüti - Atuaatua = Teplen terong aika külemi. Jokshia jokshia kaka.
65. Tasotalir - Tayimtanar = Sensopur. Tangar dak arua yimloka alir.
66. Tebangnang - Chilakonlak = Jangratema achiajemer. Mechinür/mejemnür.
67. Tejidang - Orimatang = Yakyak ta lepdanga jembiba. Tebenjazük, sülasüshiba.
68. Tejungnü - Chipokmapa = Tagütsünü. Kormenak, pei agitsüang metet.
69. Telateküm - Yapoyanü = Saaksalema/kümdanga. Yimpazümalema, süwasüria.
70. Telemla - Tero mali = Liriplireper jangratemtsüka. Tepreptepreper.
71. Telimeni - Tsüroksüroka = Payimi/tanemi ashiba. Arüja o tesashi shia raraba.
72. Temapongla - Telungbelem = shisatsü temadak. Anemsürang pi mangu.
73. Tenji - Wadangtep = Alu inyaktsü ten tulu. Joko taremdoklen wadang (ten) tila.
74. Tenoktenoka - Süokimai = Züngzünga anga. Süoksünangi mai züzüa toktsü.
75. Tentsürang - Ongkep = Anü tali apudak tesem. Anü puokla masü septüsü.
76. Terangrang - Repjamashi = Tekara/teyakyak. Pi memenep, talangang alanger.
77. Teremra - Tazüya = Temoatsü aket. Shokscü/azükaru mali.
78. Teronem/tesanem - Teshinem/tezüknem = Junga menemer. Mejungji menemer.
79. Tesangra - Tepchi = Tashi tarak. Pi awashi mangu kecha memetet.
80. Tesatok - Anemsü = Tejak tesangwa pelapelar ajak den kasa. Pokchi maka.
81. Tesep ozü - Süngki ozü = Tanur yakta nübu ajung. Menua pi memenep.
82. Tesochi - Lemtamatar = Tarak maket. Telemta tenüktelen mabensa.
83. Tesüngjem - Tejokjok = Ajemalu/mashi ain matoker. Mit tema.
84. Tesütep - Alamajem = Kasa o kasa na, tatok tajang sütep. Khenyongi balala, tapitepla masü, tepila ali.
85. Tetangshi - Züngpong = Tashi tabensa. Shongmonglang aika merasa.
86. Teyakyak - Lelepshilep = Süngsang tajet tekara. Taramaja, temang makok.
87. Teyong - Tzü menur = Telok külemi ango apuba. Tangar tugur ango menushia apuba.
88. Tiptesung - Teshibulu = Jungjunga anepalua. Mashimashi palupashi.
89. Tongupar - Aianu = Taliyim. Taaktsüla maliyim.
90. Tsüngchi - Yazülong = Ochishir. Tiazü nung tekep mei.
91. Tsüngrem - Asür = Ajak nung ajak tajung agi sütsüng. Tazüngla nisung.
92. Tulutera - Kongsükonglem = Temok tajung teyira. Kongramara/tekongra.
93. Tzüpongbang mashir - Pojen = Tila tanur, apuzür rogo. Asataor/tashireper.
94. Tzüremore - Koyatsü aputsü = Ken o tatem, aremzüktep. Tai metoktepi kasa.
95. Yalayashia - Teppetem = Nangzua aika. Kata maka, tejang kata manung.
96. Yinkepmeyi - Ramisem = Kodanga meshiranger, anema alir. Mashitsü maka nübu.
97. Zepzep - Metangmei = Tiptema/jungjunga. Rangkangmetang/süshipangtong.
98. Züklem - Telama = Yinti ajak. Sadanga yitang, tezükdang.
99. Zülazüjem - Metangsem = Kinunger adianu. Pi o pi na, tesendaktep mali.
100. Züngzünga - Odaori = Züngzünger mamatoker. Pongdakpongzüng/amata tebulu.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Khristantemi ozüng süngden mengudang, saka taküm tenla agütsü



Ethiopia kübok Axum nung aliba St. Mary of Zion Arogo Tenla noksa nung angur. Ozüng süngdenji kodanga noksa metangokdang saka Laishiba nung Anitet tapu 25 tekong 10-21 nung shia aliba nung ajemdaker imdangjema yangluba ozüng süngden telung noksa nung angur.

February 24, 2021: Ethiopia kübok Axum nung aliba St. Mary of Zion Arogo Tenla kidang Mosa ozüng ter aliba ozüng süngden yua lir, aser Ethiopia nung Khristantemi ozüng süngdenji kodanga mengudang, saka ozüng süngden kümzükdang aikati taküm tenla agütsüogo.

Ozüng süngdenji kanga temeshi, ibayongji ozüng süngden reprangtsü memelar.

Taoba ita Ethiopia kübok Tigray region nung aliba Arogo nungji nisung 800 dak tema tepsetbaji ajanga iba Tenla kidangji ozüng süngden yua aliba jungkai adoka liasü.

Ozüng süngdenji süng agi yangluba süngden tuluka lir aser süngdenji temaji hon agi menoka lir. Iba süngden nungji Mosa ozüng 10 yua lir. Temeshi ozüng süngden ya Yirusalem nung aliba Solomon Tenla kidang putu aiika yua liasü saka 586 mesüra 587 BC mapang nung sama, ta Tejen Lai nung shia lir.

Iba mapang nungjagi tenzüka temeshi süngdenji kongka aliar mejangjagi liasü; karibo ozüng süngdenji Knights Templar-i auyar tanaben yanglushiba French Cathedral nung yua lir ta bilemer, aser karibo Greece nung Alexander the Great leper nung külemi rema lir ta bilemer.

Ajisüaka Ethiopia nung Orthodox Khristantemibo ozüng süngdenji Axum yimti nung aliba St. Mary of Zion Tenla kidang lir ta jembir.

Parnoki ashiba agi, ozüng süngdenji Sheba chubatsür aser Solomon chuba na chiri auyar 10 century BC nung Ethiopia-i bener aru.

Ozüng süngden nungji lendong tulu keta lir, ibayongji belenshiba mapang nung teti nembanga ayur, aser Axum nung tasüngtet putirtemi dang ibaji reprangtsü melar.

Ozüng süngdenji kodanga noksa metangokdang saka Anitet tapu 25 tekong 10-21 nung shia aliba nung ajemdaker imdangjema yangluba noksatem dang lir.

Ozüng süngden tanüker putirtemi iba anasaji aonung-anüngdang methitemi sarasademer aser teronem menemtsü rongka Tsüngrem nem tenüngsang agütsür.

Ethiopia linük kübok Tigray region nung Arogo tem aika amakba mapang nung putirtem aser Arogo lenirtem densema nisung 900 dak tema tepsetogo.

January ita tetenzüklen-a Belgium nung aliba non-profit organisation - European External Programme with Africa teloki, Ethiopia kübok Axum nung aliba Arogo Tenla kiji amakdang Tenla kidang nungi nisung 750 aniteter khaset, ta metetdakja liasü.

Christian charity telok Aid to the Church in Need (ACN) den jembidang nisung kati, "Iba Tenla kidangji nisung 1,000 shi liasü. Nisung 750 tepset aser aika yirua liasü," ta metetdaksü.

"Axum yimti nung ozüng süngden lir, anungji ozüng süngden kümzüksü atema tamangertem Tenla kidangji adenshi asütsüa akok ta bilemer. Parnok Tenla kidang nungjagi kimai anitetba sülen khaset," ta nisungba jagisa metetdaksü.

Yaküm November ita nung Tigray Peoples' Liberation Front (TPLF) aser Ethiopia nung Nobel-prize winner angusang Ato kilonser Abiy Ahmed-i aniba sorkar sepaitem na tsüngda rara tenzüka liasü.

ACN-i ashiba agi, yimtenren tsütsü rara adokba ajanga Khristantem aser Muslim nungner aika süogo, ajisüaka iba rara ya tamangba yimsü den sendaktepa mali.

"Tetenzük nungi Eritrea sepaitemi iba tongbang nung shilem agir. Sorkaribo ibaji menangzüker saka Tigray anüdoklen aser anüolen nisung jenti tepsetertemji Eritrea nungner sepaitem ajanga lir," ta kasa osang ajanga metetdaksü.

Iba rara ajangasa Tenla kitem aser mosque rongdoktsüdang mesüra raksatsüdang Aso 13buba

mapang nungi amshia rizüngba kaket ken o aika rongdokogo.

University of Hamburg nung Centre for Ethiopian & Eritrean studies-i item tatalokba atema tebilemstü kaa lemsatepogo. Parnoki shidi ka ajanga, "Tigray nung aliba Tenla kitem aser temeshi kiojentem nungi ayuaba kaket ken otemji kobi melii Ethiopia nungi miima bener aoba sülen tanga linüktem nung aliba antiquities markets nung yokadoktsü," ta metetdaksü.

"Onoki külem tenzükertem dang sobaliba kiojentem kümzüka ayutsü asoshi amalitepa inyadoktsüner," ta parnokisa metetdaksü.

India nung ano state ka nung Anti-Conversion ozüng benoktsü

February 24, 2021: Tawa India kübok state kar nung anti-conversion ozüng benokba sülen Haryana nunga state sorkari anti-conversion ozüng ka benoktsü, ta sangdongogo.

Haryana nung Khristantemi iba ozüng benokba ajanga state nung Khristantem ano taliba reshikangshitsü, ta tsübua bilemer.

Taoba Brihostibarnü (February 18, 2021) osangbenertem den jembidang Haryana nung Home Minister, Anil Vij-i, state nung anti-conversion ozüng ka benoktsü atema pai ketdangsertem dang

draft süang ta tuyuogo, ta metetdaksü.

Drafting committee senden nung jembidang Home Minister-i, "Iba ozüng benokba ajanga tashiyim amshia tamangba yimsü meyipdaksüba, mesüzüka tamangba yimsü meyipdaksüba, kibong akümba ajanga mesüra ozüng alema tanga lenmang balala ajanga tamangba yimsü meyipdaksüba nokdangtsü," ta metetdaksü.

"Iba ozüng alema aibelenertem nem temerenshi tulu agütsütsü," ta Home Minister-i sangdong ka ajanga

draft süang ta tuyuogo, ta metetdaksü. Iba ozüng ya talisa Muslim nungner aser Khristantem anema lir. Hindu yimsü alia amangertemi, India nung Khristantem aser Muslim nungneri sensaker Hindu nungertem mesüzüka tamangba yimsü meyipdaksür, ta tai tonglokja arudar.

India nung tang anti-conversion ozüng benoka aliba state temji Odisha, Uttar Pradesh, Arunachal Pradesh, Chhattisgarh, Gujarat, Jharkhand, Himachal Pradesh, Madhya Pradesh aser Uttarakhand state tem lir.

Religions for Peace Intl.-i Myanmar nung rara anentsü mepishir

February 24, 2021: Religions for Peace Myanmar aser Religions for Peace International-i tang Myanmar linük nung tai maket nisungtem azü tokshiba aitsüba den külemi linük nung lenirtem dang Myanmar yimti-yimdongtem nung rara anentsü mepishi.

Religions for Peace Myanmar aser Religions for Peace International-i, taküm kaji temeshi aser Myanmar nüburtemi ibaji akhangerbaji parnokia pusemer, ta metetdaksü.

"Tawa tatalokbatem ajanga linük nung telemsa adokdaksüogo aser mapang talangka timtemba linükji

yimdong nung raraba ajanga masü saka ken o jembiba ajanga dang aneptsü," ta lenirtemi metetdaksü.

"Tang iba linük nung sensakertem wara ajanga senotsü agi timtemba aser chiyungtsü agi anüngba densema tayongzüka jenti lir, anungji taküm alitsü atema linük nung yimjung nüngdaker," ta lenirtemi metetdaksü.

"Onoki ajak dang, talisa sepaitem dang tebilemstü onük ajak bentetsü atema ken o jembitsü mepishir," ta parnokisa metetdaksü.

Religions for Peace teloki alima nung rara malitsü atema mangdang yur inyaker, aser

parnoki tesüiba küm 10 tsüngda Myanmar nung yimjung aser democracy aliba atema tenüngsang agütsü.

Lenirtemisa ASEAN linüktem danga Myanmar nem maneni teyari balala agüjang ta mepishia metetdaksü.

Yangon nung tongti putir, Charles Bo ya Religions for Peace International nung tatong Tir lir aser Religions for Peace Myanmar nunga tongti lir.

February 1 anepdang Myanmar nung sepaitemi democracy lenirtem apuba sülen linük nung emergency sangdongba sülen linük tesem balala nung longkak aitdang nisung asembo süogo.

ANO GO ABEN TSÜNGREM DEN

Asenok sempettem nung tanela asenok den lir

1 Korint 12:1-11

Tanela sempet tapu-tapu lir saka tanela ka dang. 1 Korint 12:4

Asenoki sempet akaba ta jembir aser iba sempet agütsü ka lir aser item sempet agütsürji Tsüngrem lir. Sempet shiaji Tsüngrem nungi angur. Asenoki inyaktetba asükümtsü asoshi kecha room mali.

Tsüngremji teti tagütsür ka ama arur. Kodang Tanela Temeshi Tsüngrem O, baptiba aser Kibuba Benjung arudir, Pai tamang agütsür. Idangji Pai tashi balaka agütsür koba ajanga Pai Pa atenba jungkai adoktsür. Asenok nem tanela sempetji sempet ta bilemtetdaksür. Asenoki ibaji tagütsüsang atema amshitsü, mesüra aji asenoki asüküma aser pei atema dang aliba ajanga endoker.

Ibai Tsüngremi agütsür asünung asenok shingaia Kechiba ajak nem kasa sempet magütsür ta akangtsü makok.

Asenok shisa taka süra kibong alir ajak kasa sempettem akatsüla ta meyimlatsüla. Kodang arogo nung kasa sempetji lir ta amadokdir, idangji telemsa aser tashishitep adoker. Kodang tanela kasa sempettem Pai mulungba agütsür ta bilemtetdir, idangji arogoji melemsai alir. Item ajak dang temaba Tsüngremi Yisu nung, asen Kümtetdakba sempet tulutiba agütsü.

Tanela Temeshi, nai kü nem agütsüba sempettem angutsü metetsü aser tangar nem agütsüba sempet nung pelatsü kü dang yariang. Asenoki Khrista ajanga asenok sempettem Tsüngrem mapa nung amshidi. Amen.

OLONG PAITEP # 5735

1		2			3		4			5
				6		7				
8										
						9				
		10								
11										12
					13			14		
15										
16							17			

TIPILEN		LANGTSÜNGLEN	
1. Nüji masü	- (4)	1. Jila tulu	- (5)
3. Technütsüka	- (6)	2. Sarasademdang tembang	- (4)
7. Aketa shirangba	- (5)	4. Tarutsü indang ashirtem	- (6)
8. Pi	- (6)	5. Alia	- (5)
9. Amena	- (5)	6. Mojing	- (5)
10. Kinü	- (5)	9. Tai inyakba metet	- (5)
11. Tanang masü	- (5)	10. Medemer chijiba	- (6)
13. Lenmang	- (6)	11. Tatokba / Amadok	- (5)
15. Nübo tedi	- (5)	12. Anüngdang masü	- (5)
16. Tuoshi	- (6)	14. Jabaso masü	- (4)
17. Shiruru apuba temenatsü	- (4)		

OLONG PAITEP # 5734 TELANGZÜBA

TIPILEN :		LANGTSÜNGLEN :	
1. Tesangra, 5. Mungo, 7. Kisen,		1. Temesen, 2. Raksa, 3. Aon, 4. Aso,	
8. Salem, 12. Semki, 14. Kilem,		6. Nile, 9. Alizüng, 10. Omen,	
15. Kensü, 16. Sangpang.		11. Lemta, 13. Ola, 14. Kin.	

Agüja aliba noksa nung meputepi aliba bushiang



TANÜBO NAI LANGZÜANG

Q. FAO (Food and Agriculture Organization) nung member states _____ dena lir.
 A.197 B.137 C.157 D.177
 _____ (Taruba adok nung onoki langzüsü)
YASHI ADOK TELANGZÜBA : Both A and B

NAI-A YA METETTER MA?

INDIA NUNG 'NATIONAL INSTITUTE RANKING FRAMEWORK' (NIRF) AJANGA ASADANGTETBA MEDICAL COLLEGE TAJUNG TEM: 2021

(Yashi adok nungi...)

- Kasturba Medical College, Mangaluru
- Jamia Hamdard, New Delhi
- Siksha 'O' Anusandhan, Bhubaneswar
- Dr. D. Y. Patil Vidyapeeth, Pune
- Govt. Medical College and Hospital, Chandigarh
- Dayanand Medical College, Ludhiana
- Sawai Man Singh Medical College, Jaipur
- PSG Institute of Medical Sciences and Research, Coimbatore
- Datta Meghe Institute of Medical Sciences, Wardha
- M. S. Ramaiah Medical College, Bengaluru
- S. R. M. Institute of Science and Technology, Chennai
- Kalinga Institute of Industrial Technology, Bhubaneswar
- Maharishi Markandeshwar, Ambala
- Saveetha Institute of Medical and Technical Sciences, Chennai
- Annamalai University, Annamalinagar
- K. S. Hegde Medical Academy, Mangaluru
- Krishna Institute of Medical Sciences, Karad
- Sri Venkateswara Institute of Medical Sciences, Tirupati
- Regional Institute of Medical Sciences, Imphal West
- Mahatma Gandhi Medical College and Research Institute, Puducherry

SUDOKU # 5777

TELANGZUBA # 5776

3	9		4	6				7	8	9	4	6	1	3	5	2	
		7				3	2	1	6	4	5	2	3	9	8	7	
		6	3	7		5		2	5	3	9	7	8	6	1	4	
		3		4	9			4	1	6	3	5	7	8	2	9	
7	6					4	5	9	7	8	2	1	6	5	4	3	
9		4		6	7		1	3	2	5	8	9	4	1	7	6	
1	5			3			2	6	6	9	7	1	8	2	4	3	5
4									8	3	2	6	4	5	7	9	1
		9			2		4	7	5	4	1	7	3	9	2	6	8

OJANG LUTEP # 5323

- SUNING :
- TNGSÜDA :
- EMÜKMTENER :
- BAALI :
- ANAJGA :
- JUTANG :
- AKAJ :
- TAUNMAJG :
- MAKÜ :
- SÜÜDANGKTR :

OJANG LUTEP TELANGZÜBA # 5322

KENSHIOSHIRI JEMBISA YUR TEPANG NUNG TEMELI MASEMER ROGO TAI TONGLOKTSÜ

TAN HOPTA ATEMA - KOMA SÜLA ?

Q. Ao oshi renloktsü atema Aor kibongtem nung teyaritepertem tangar kin nungi masü Aotsür Aortem dang ayu nunga koma süla?



February 24, 2021 nü Ahmedabad nung aliba Motera Stadium nung Sardar Vallabhbhai Patel Sports Enclave meshitetba sentong nung linük Tir, Ram Nath Kovind aser Union Home Minister Amit Shah na adenba noksa nung angur.

Union Cabinet-i Puducherry nung Tir yimsüsüba benoktsü lemetet

New Delhi, February 24 (Agencies): Tang Puducherry nung yimtenren anakshiba mapang nung Bodhbarnü Union Cabinet-i Puducherry nung Tir yimsüsüba benoktsü atema temepishiba ka agizükogo, ta osang ka ajanga metetdaksü. Anogo ishika jakdang Puducherry nung Congress-DMK teloktep sorkar chirepa liasü. Iba teloktep nung MLA aika anenba sülen nübo ajema akümbe agi sorkar chirep. Assembly nung floor test agiba sülen taoba Puducherry Chief

Minister, M V Narayanasamy den cabinet züngsemtemi menden nungi anenba shidi Angh nem agüja liasü. Puducherry nung Tir yimsüsüba benoktsü atema Union Cabinet-i telemtetba agiba dak sendakba nung Bodhbarnü osangbenertem den jembidang Union Minister, Prakash Javadekar-i, Chief Minister-i menden nungi anenba sülen party kati danga sorkar akümbsü masüngdangba agi Tir yimsüsüba benoktsü atema Cabinet-i telemtetba agi, ta metetdaksü.

Puducherry Lieutenant Governor-i Puducherry nung Tir yimsüsüba alitsü atema benokba sülen Cabinet-ia kasa telemtetbaji agiogo. Javadekar-isa, linük Tiri agizükba sülen Assembly anentsü aser Puducherry nung telemtetba agia maparen tenzüksü, ta metetdaksü. Kobi melii Election Commission state pezü denji külemi Union Territory Puducherry nung election agitsü anogo sangdongba sülen model code of conduct (MCC) benoktsü.

March 1 nungi arrshi küm 60 temapur nem vaccine agütsütsü: Centre

New Delhi, February 24 (Agencies): Bodhbarnü Centre sorkari, March 1 nungi tenzüka arrshi küm 60 ser temapurtem aser comorbidities keta alir arrshi küm 45 temapurtem nem coronavirus vaccine agütsütsü, ta metetdaksü. New Delhi nung osangbenertem den jembidang Union Minister, Prakash Javadekar-i, linük nung aliba sorkar centres 10,000 nung vaccine agütsübaji angati asütsü, ta metetdaksü. Nija centres 20,000 nunga vaccine agütsütsü saka idakjibo vaccine agiba atema sen agütsütsüsa akümbsü, ta Union Minister-isa metetdaksü. Javadekar-i, "Parnoki (vaccine agirtem) sen kwi agütsütsüla'ar anogo asem-pezü tsüngda Union health ministry-i telemtetba agitsü, kechiyong tang vaccine yanglurtem aser hospitals den tang tejembidak lir," ta metetdaksü. Nüburtemi koba vaccine-Covishield mesüra COVAXIN aginüdir agitsü asü?, ta asüngdangba langzüdang Javadekar-i, India nung vaccine

ana yanglutetba atema linüki nüma atanger aser vaccine anapronglaji tajung, ta ashi. Oxford-AstraZeneca indang Covishield ya Serum Institute of India-i yanglur aser Covaxin vaccine ya Bharat Biotech-i yanglur. Javadekar-isa, India nung vaccination takok ngua agidar aser tashishiba mesüra metokmeperi kecha mali, ta metetdaksü. Minister tem aser Ato kilonser-a tangbo vaccine agitsü atema temsüa alirtem rongnung densema lir, anungji parnokia vaccine agitsü asü, ta asüngdangba langzüdang Javadekar-i, shibaisa vaccine aginüdir March 1 nungi agitsü akok, ta ashi. Taküm July ita tashi nung nütsüng crore 30 vaccination agi ayimjemtsü. Health ministry-i ashiba agi, February 24 tashi nung nisung 1,21,65,598-i coronavirus vaccine agiogo, item rongnung healthworkers 64,98,300, health workers tanabuba dose agir 13,98,400 aser frontline workers 42,68,898 densema lir.

PM Modi-i Donald Trump tia dang nungi tamajungba ajurutsü: Mamata

Kolkata, February 24 (Agencies): Ato kilonser, Narendra Modi aija Bodhbarnü West Bengal Chief Minister, Mamata Banerjee-i, Modi-i taoba mapang US Tir, Donald Trump dang nungi tia tamajungba ajurutsü, ta metetdaksü. Ato kilonser, Modi aser Union Home Minister, Amit Shah nati linük tesem ajaklen tiyazü aser tesempa proker, ta shia Trinamool Congress tongti, Mamata-i, "Linük nung rara

tuluba adokdaksürji Ato kilonser Modi lir," ta ashi. Bodhbarnü West Bengal kübok Hooghly nung assembly election atema nüboyim sentong ka nung jembidang lai, "Taruba Assembly election nunng ni goalkeeper asütsü aser BJP-i goal ka danga magütsütetsü," ta ashi. Election nüboyim sentong nungji Tollywood aser saisapongertema aika dena liasü. Parnok rongnung cricket asayar Manoj Tiwary aser

Bengali actors Manali Dey, Saayoni Ghosh, June Malia aser Kanchan Mallik nungera densema liasü. Mamata Banerjee-isa, CBI-i lar kinünger, Abhishek Banerjee kinüngtsü jaokbaji Bengal nung tetsürtem mezüngmeshiba den kasa lir, ta ashi. Nagmati ochimashi dak sendakba ken o nung Amongnü CBI-i Trinamool Congress MP, Abhishek Banerjee kinüngtsü, Rujira nem tejaokba shidi ka agütsü.



February 24, 2021 nü Bhopal nung Congress lenir aser Rajya Sabha MP, Digvijay Singh leniba nung Congress lenirtem Election Commission Office-i oa State Election Commission, BP Singh dang local bodies elections nung ballot papers amshitsü mepishiba noksa nung angur.

Aluyimertemi tractor lakh 40 amshia Parliament-i aotsü: Tikait

Sikar, February 24 (Agencies): Centre sorkar amokmerena Bharatiya Kisan Union (BKU) lenir, Rakesh Tikait-i, sorkari aluyimba ozüng asemji magienra aluyimertemi tractor lakh 40 amshia longkak aita Parliament-i aotsü, ta metetdaksü. Rajasthan kübok Sikar nung aluyimertem lokti senden nung jembidang Tikait-i, "Onoki Parliament-i longkak aita aotsü. Onoki jelia iba osangji parnok (sorkar) nem metetdaksütsü. Aluyimba ozüngtem magienra tangbo onoki tractor lakh 4 masü saka tractor lakh 40 tashi amshitsü," ta metetdaksü. Tikait-isa, aluyimba ozüng tasenba nungji aluyimertem nem minimum support price (MSP) agütsütsü atema inoksemtsüla, ta ashi. February 18 nü Haryana kübok Kharak Punia nung maha panchayat aliba mapang nunga Tikait-i, aluyimba ozüng asem magienra aluyimertemi assembly election agitsü aliba state- West Bengal nunga

longkak aittsü, ta metetdakja liasü. February 19 nüa Tikait-i, "West Bengal nung tractor rally agitsü atema onoki jembidar," ta metetdakja liasü. January 26, 2021 nü Republic day anogomong nung aluyimertemi longkak aitha mapang nung rara tulu adoka nisung aika yiruba den kiojen jenti raksaa liasü. Iba rara dak sendakba nung Delhi police-i FIR ajak agi 22 benokogo aser item rongnung aluyimer ka asüba dak sendakba FIR ka densema lir. Aluyimertemi Delhi telungi aitsü atema tenokdangba atsü raksatsüba sülen nija aser sorkar indang kiojen aika raksatsüba ajanga takoksa kanga nguogo. November 26, 2020 nungi tenzüka Punjab, Haryana, Maharashtra aser Uttar Pradesh densema state aika nungi aluyimertem Delhi arrtsülen adenshia aluyimba ozüng asem anema tang tashi longkak aitar.



February 24, 2021 nü AIADMK headquarters, Chennai nung Tamil Nadu Chief Minister, K Palaniswami aser Deputy CM, O Panneerselvam na den AIADMK lenirtemi taoba mapang party tongti, asür Jayalalithaa asoba anogomong nung benjungtepba noksa nung angur.

Ecuador tepuokdak rongrong adok; nisung 75 asü



Guayaquil, Ecuador nung aliba tepuokdak February 23, 2021 nü rongrong adokba sülen yangji aliba kinungertem tepuokdak tesem anasa adenshia aliba noksa nung angur. Telok balala tsüngta Ecuador tepuokdak tesem asem tashinung rongrong adoka nisung 75 asü, ta Director, Comprehensive Care Service for Adults Deprived of Liberty, Edmundo Moncayo-i Quito nung osangbener senden ka nung ashi.

Quito, Tsüklai/February 24

(Agencies): Ecuador nung tepuokdak tesem balala asem nung rongdong adoka nisung tajemba agi 75 asü aser aika yiru, ta ketdangsürtemi Mongulbarnü ashi.

Guayaquil, Cuenca aser Latacunga jila tem nung tepuokdak tesem nung rongrong adokba ya mapa amajung inyakba telok balala tsüngta mangatetep nungi tenzüik, ta ketdangsürtemi ashir.

Tepuokdak alirtem ya prangbong aser kotari agi tepset, ta yangji aliba osangbener temi ashi.

"Item tepuokdak tesemtem nung telok ana lenir agi raktepba ajanga adok," ta Ecuador indang prison agency nung director Edmundo Moncayo-i ashi.

Ketdangsürtemi police talila 800 densemer tepuokdak telungzüik nung tensa aziükteta lir. Iba lendong nung police kar yiru saka asü-amaba osang

mali, ta Moncayo-i ashi.

Security forces temi tensa aziüoktsü merangba mapang shisabulua aliba kinungertem Ecuador anüolen Guayaquil yimti nung aliba tepuokdak tesem kimalen adenshi, kong nisung 21 asü, ta ketdangsürtemi ashi.

Tanü Guayas, Azuay aser Cotopaxi nung atalokba tensa @PoliciaEcuador ajanga aziüoker. Tang tashinung nisung 50 dak tema asüba osang arua lir. Onoki maneni osang agütsütsü... ta Ecuador police-i Twitter nung metetdaksü.

Linük south tsütsü Cuenca nung aliba tepuokdak nisung 33 asü aser Latacunga jila nunga nisung ti asü, ta sorkar indang SNAI prisons management director Edmundo Moncayo-i ashi.

Iba rongrong nung tanüker sashia yoka aliba tepuokdak alirtem densema lir, ta Police General Commander Patricio Carrillo-i Mongulbarnü Twitter

nung ashi.

"Tangbo tepuokdak alir ajak nem tenokdangba agüja aziüoka lir," ta Carrillo-i ashi.

Tepuokdak alirtemi tanükertem apuba sülen rongrong ya Hobar aonung tenzüik ta ashir.

Tepuokdak tesemtem nungi ambulance kar aoba nguogo, ta yangji alirtemi ashi.

Rongrong adokba osang prokshiba mapang tepuokdak alir kinungertem osang tali metettsü asoshi adenshia liasü.

Mapa tamajung inyakba telok temi linük nung tepuokdak tesem balala nung aziüdokshi mapa inyaka, ta Ecuador Tir Lenin Moreno-ia tweet asü.

Ecuador nung tepuokdak alir telok balala tsüngta rongrong ya mapang shia adoker.

December ita Latacunga nung aliba tepuokdak tesem ka nung raratepba mapang yangji alir nisung pongu takum sama.

Niger tir inyaktsü Mohamed Bazoum shimogo

Niamey, Tsüklai/February 24 (Agencies): Tang yimsü tesüdak telok nungi Mohamed Bazoum-i linük tir election nung takok nguogo, ta Niger indang electoral commission ajanga sangdong.

February 21 nü vote agütsüba nung Bazoum-i shilem 55.75 nguteta taoba tir Mahamane Ousmane madak takok angu, shibai vote shilem 44.25 nguteta liasü, ta Independent National Electoral Commission (CENI) mendenpuba, Issaka Souna-i Mongulbarnü sangdong.

Iba election nung ashikülak mapa inyaka ballot box tem ayuaba aser mima ayuba

den vote agütsür amokmeren, ta Ousmane'er teloki Mongulbarnep tai tonglokja liasü. Ajsüaka parnoki kuli kecha magütsü.

Election commission ajanga vote züngdangba sangdongba mapang, "Iba election osang sangdongba tekeratiba nung anena atatsü onoki akhanger, kong Niger nübur nem pei tangatetba lemsatsü maongka magütsü," ta campaign team ajanga sangdong ka nung ashi.

Tir Mahamadou Issoufou ya küm pongu kümsük ana tashi inyakba sülen pa sasa mapa yutsü aser 1960 küm

France nungi nüjiso anguba sülen Niger nüburtemi shimtetba lenir tsüngda tashi agütsütepba tang mezüngbuba akumtsü asoshi lenmang lapoktsü.


Iba makamait linük nung telungpur telok balalai lendong agüja anasa aliba Mali nungi Nigeria linüktem tashinung kongshi.

Election agiba anogo Niger anüolen tsütsü Tillaberi region nung gari kati ali nung rema aliba bomb ka nung menüngshia CENI nung inyaker nisung tenet asü.

Hobar-nüa iba ama bomb ka poka southeast tsütsü Diffa region nung polling station ka tekolakba asü. Iba lendong nung election ketdangsür teku yirua liasü.

December 27 nü vote mezüngbuba agütsüba mapang taoba mapang interior minister inyaksang aser Issoufou den yariteper Bazoum-i vote shilem 39 shi ngua liasü. Iba mapang Ousmane-i vote shilem 17 dang ngutet.

1993 küm Ousmane ya democracy yimya amshia shimtetba tir mezüngbuba akum, saka küm asem lir mitkartemi tashiyim amshia atsüngdoka liasü. Iba sülen tain agi ponguben buba pai tir menden asoshi tokteper alitsü.



Mohamed Bazoum

Court tenokdangba liaka Malaysia-i Myanmar nungertem yokogo

Kuala Lumpur, Tsüklai/February 24 (Agencies):

Mitkari yimsü asüba Myanmar linüki par nüburtem meyipa yokra timtem ajurutsü ta shisabulua alidang court kati parnok khen atema soita atatsü totuyuba agüjaka Malaysia-i Myanmar senso 1,086 meyipa yokogo.

Malaysia indang immigration department nung director-general, Kairul Dzaimie Daud-i ashiba agi, item nisung telok ka yagi par sasa meyipa aotsü molungtet aser Myanmar navy indang rong asem nung meyipa yok.

Malaysia nungi nisung 1,200 shi meindoktsü aliba ya Bodhbarnep 10:00 ako tashi atatsü asoshi Kuala Lumpur High Court ajanga tetuyuba agütsür ghonda ishika lir iba mera ya agia liasü.

Amnesty International and Asylum Access ajanga temebishiba ken o ka benokba nung telangzüba agüja court-i iba obendang ya agütsü, kechiaser parnok ya lendong

nung lir aser pua alir ya ter dak tema tanur lir, ta ashi.

Meyipa yoker ya ajak Myanmar senso lir, shirnok taoba küm pua liasü aser yangji asylum-seeker mesüra reshikangshia amshiba Rohingya kin nungi refugee kata mali, ta Daud-i ashi.

"Meyipa yoker ajungai par sasa aotsü molung aser shinga tashiyim agi yoka mali," ta immigration tekolakbai sangdong ka nung ashi.

Sangdong nung court totuyuba mesüra nisung 1,200 yoktsü melen nisung 1,086 dang yokba indang rateta shia mali.

Court ajanga ken o ya Bodhbarnü jembitsü, ta Amnesty International Malaysia indang Executive Director Katrina Jorene Maliamauv-i shia liasü aser Myanmar dang UNHRC nem iba telok nungi asylum bushirtem ali mali jangjatsü melang, ta ajungshia liasü.

"Sorkari court totuyuba akumtsübuttsüla aser nisung

1,200 nungi kata tanü meyoktsüla," ta court obendang sülen lai shia liasü.

February 1 nü mitkartemi sorkar atsüngdoker aliba Myanmar linüki item nisungtem yokba ya taochi maliba mapa ka lir, ta telok ana yagi shia aru.

Tanurtem meyipa yokba ajanga Malaysia-i Convention on the Rights of the Child kübok bendanga agüja inyakba aser par Child Act anema inyaker ama akumtsü, kong tanurtem kumzüka ayutsü sorkar tebilemstü, ta jangja-jangja shia lir, ta Asylum Access indang executive director Tham Hui Ying-i ashi.

Mitkartemi sorkar atsüngdoka linük nung yimsü asüba aser State Counsellor Aung San Suu Kyi aser Tir Win Myint na densema election ajanga shimtetba lenirtem apuba asoshi Myanmar nung nüburtem longkak aiter. Mitkartemi iba mera agiba atema region nung linük kari süoki ia bilemstüba rongnung Malaysia ya ka lir.

"Myanmar yimtenren tsütsü mepetmesü adoka aliba asoshi alimai aitsüba mapang Malaysia sorkari tensa kanga mejungi akumba linüki nisung 1,200 yoktsü shimtetba ajanga onok süngmanger," ta Amnesty and Asylum Access ajanga ashi.

Amnesty International ajanga Ato Kilonser Muhyiddin Yassin dangi Mongulbarnü temepishiba shidi ka zülüogo, kong Myanmar nungertem pei linüki meyipa yoktsü sentong yangluba atema shia liasü. Malaysia dang item nisungtem meyipa yokba anentsü asoshi takhangba agüja züluba shidi 1,000 dak tema aruogo, ta ashir.

Malaysia nungya linük balala nungi tejangja aser mejangja migrant million aika lir, aser parnok ya Malaysia nungeri meinyaknüba mapa tasak taret inyaker.

Iba den refugee aser asylum bushir nisung 180,000 jungnüa lir, ta United Nations indang refugee agency, UNHCR ajanga ashi.

Item ya Rohingya nunger 102,250 densema timba Myanmar nungi lir, aser ajidang masü ano nisung meyirijang aika ethnic kin tilatem nungi pei linük nung rara ajanga jena arurtem lir.

Parnok ya 'undocumented' migrant ama aputsü akok, kechiaser Malaysia ya UN Convention on Refugee züngsem ka masü. UN refugee agency ajanga Malaysia nung aliba immigration detention centre tem 2019 küm August ita nungi mesemdangteter.

"Myanmar nungi jena aoba nüburtem kumzüoktsü aser UN tetsüng ajemokdaksütsü melatsü tang mapang lir, aser parnok ya mitkar lenir kabu nung amoktsütsü mapang masü," ta Fortify Rights indang executive director Amy Smith-i sangdong ka nung ashi.

"Iba sentong ya ajanga nüburtem takum lendongbang nung yutsür aser Myanmar nung tashiyim amshiba mitkar nem temeden agütsür."

AR-i Bongkolong yimtsüng nung medical camp ka katsü



Dimapur, Tsüklai/February 24 (TYO): IGAR (North) kübok Assam Rifles Jalukie Battalion-i, February 23nü Peren District, Athibung Sub Division nung Bongkolong yimtsüng nung medical camp aser COVID 19 awareness campaign ka ayongzüka katsüogo. Assam Rifles-i yimtsüng

nung yimdaklirtem temang tendangtsüba den wara pokteter aliba mapang temang merekmejua alitsüba jenjang balala indang yimdaklirtem nem tangazükba agütsü aser iba den parnok nem mozüa agüja liasü. Tanur 30, tetsür 79 aser tebur 72 ta ajak senteper yimdaklir 181 iba camp ajanga ajangzükogo. GB tem aser Chairman-i anir yimdaklirtemi, nüburtem ajangzüksü atema sentong tajung atonga inyakba atema AR dang kanga pelaba lemsatepa liasü.

Aerosmith-i UK aser European tour thinener

Tsüklai/February 24, 2021 (Agencies): Aerosmith-i UK aser European tour 2022 küm tashi thinenogo.

Steven Tyler aser par teloki iba kenten sentong tang agi tanabenbuba thinener. COVID-19 wara pokteter ajanga parnoki 2020 küm agitsü aliba sentongtem taküm agitsü asoshi thinena liasü.

Nüngtugu 'Dream On' ken atenba telok yagi parnok indang fan tem ajak kumzüka toktsütsü nükjidong nung kentenba sentongtem 2022 küm June aser July ita agitsü asoshi telemtetba agiogo.

Taoba mapang ticket alia alibatem ajak maneni amshitettsü.

Band sangdong ka ajanga ashiba agi, "tensa majungba aser fan tem kumzüka toktsütsü atema 2021 European Tour 2022-i thinenogo."

"Anogo melenshiba dak sendakba nung osang tejangja agitsü atema angashilaa liang mesera ticket aliba tesem den tongtepratepang. Ticket ajak agitsü," ta parnokisa ashi.

UK semdangba mapang parnoki June 22, 2022 nü London O2, June 28 nü Manchester Arena aser July 1 nü Sheffield nung FlyDSA Arena nung shilem agitsü.

Iba sülen parnok maneni 'Deuces Are Wild' Las Vegas residency sentong nung shilem agitsü.

Parnoki tatamsa UK nung 2017 küm Download Festival nung shilem agiogo, koba UK tour tatembangbuba asütsü ta bilema liasü.

Kasa mapang nung guitarist Joe Perry-i taoba mapang Aerosmith den mapang tapet ka nung kensep ka yanglutsü

jangraba lemsatepogo.

Arishi küm 70 tain Perry-i, Hollywood Vampires' bandmates Alice Cooper aser Johnny Depp nung den 2019 LP 'Rise' atema studio nung mapa tembangba sülen par telok kong Joey Kramer, Brad Whitford aser Tom Hamilton densema lir parnok den kensep tasen ka yanglutsü jangraba lemsatepogo.

Pai, "Vampires record medenzük tsüngda ni solo album [Hollywood Vampires album tasenba memaongok tsüngda] tembanga yangluogo, anungji ni studio nung ita asem pezü shi intokogo.

"Ni record süner anungji mapang kodang sütepdir idangji Aerosmith den kensep tasen ka yanglutsü," ta ashi.

Aerosmith-i tatamsa 2012 küm 'Music from Another Dimension!' kensep mangaokogo.

Realme Narzo 30A, Narzo 30 Pro 5G India nung sayaogo

Tsüklai/February 24, 2021 (Agencies): Realme-i Narzo 30A aser Narzo 30 Pro 5G densema Realme Narzo 30 series nung phone tasen ana sayaogo. Terprangtsü aser specifications medemdangra Realme Narzo 30 Pro 5G terprangtsü Realme Q2 mesüker, koba China nung taoba küm sayaogo. Smartphone anaprongla nung octa-core MediaTek chipsets aser 6.5-inch display keta lir. Realme-i sayaba phone ana nungya TWS earbuds tasenba, Realme Buds Air 2 aser doughnut-shaped Realme Motion Activated Night Light keta aliba angutsü.

Realme Narzo 30A, 3GB RAM + 32GB storage variant ya India nung sen 8,999 aser 4GB RAM + 64GB storage variant sen 9,999 agi angutsü. Customer temi iba phone ya March 4 nü nungi tenzüka Laser Black aser Laser Blue sentsü nung alia amshitettsü. Kasa mapang nung Realme Narzo 30 Pro 5G 6GB RAM + 64GB storage variant sen 16,999 aser 8GB RAM + 128GB storage model sen 19,999 agi angutsü. India nung iba phone March 4 nü nungi tenzüka ayoktsü. 30 Pro ya Sword Black aser Blade Silver sentsü nung angutsü. Phone anaprongla ya Flipkart aser Realme online aser offline channels tem ajanga ayoktsü. Realme Motion Activated Night Light jenjang 599 asütsü.

Realme 30A nung 6.5-inch HD+ (720x1,600 pixels) display den 20:9 aspect ratio keta lir. Phone telung nung octa-core MediaTek Helio G85 chipset den 4GB RAM aser 64GB onboard storage inokja lir. Phone ajanga dual-SIM cards support asütsü

asér operating system ji Android 10 den Realme UI on top, out-of-the-box asütsü. Phone tesülen dual camera setup ka inokja lir kong 13-megapixel primary sensor den f/2.2 aperture aser monochrome portrait sensor aser f/2.4 lens ka keta lir. Selfie atema 8-megapixel camera sensor den f/2.0 aperture inokja lir.

Realme Narzo 30A nung tanga tongtibang features tem rongnung rear-mounted fingerprint sensor, 4G LTE, Wi-Fi 802.11ac, Bluetooth v5.0, aser GPS/ A-GPS densema lir. Phone nem 6,000mAh battery ka ajanga tashi agütsütsü aser USB Type-C port ajanga 18W fast charging support asütsü.

Realme Narzo 30 Pro 5G nung 6.5-inch full-HD+

(1,080x2,400 pixels) display (with 120Hz refresh rate) aser octa-core MediaTek Dimensity 800U SoC keta lir. Tesülen camera setup nung 48-megapixel primary sensor den f/1.8 aperture, 8-megapixel ultra-wide-angle camera ka aser 2-megapixel macro shooter ka densema lir. Phone tejaklen selfie atema 16-megapixel shooter ka keta aliba angutsü.

Realme Narzo 30 Pro 5G nung tanga features tem rongnung 5G, 4G LTE, Wi-Fi 802.11 ac, Bluetooth v5.1, aser GPS/A-GPS densema lir. Phone nem 5,000mAh battery ka ajanga tashi agütsütsü aser USB Type-C port ajanga 30W Dart Charge fast charging dena support asütsü.

Mulungnen O



S. MERENNUNGSANG LONGKUMER

Aso: Nov. 10, 1942 - Asü : Feb. 18, 2021

Onoki teti meima aliba Obala Asür S. Merennungsang Longkumer (Longjang) mapang tatsüka shiranger akümüli tembangdang shirnokisa sarasadem, rongsen, shisatsü aser nübu agi yaritepogo, nenok ajak dang ozüi pelaba iba zülü ajanga lemsateper. Tulusang Tsüngremi nenok mapa tajung maneni moajang ta ozü tamang sarasadem.

- Temeim Chirnur, Semchir & Kinungertem

Mulungnen O



ASO 07.11.1930

ASÜ 19.02.2021

Late Merangkaba Chungliyimsen

Onoki teti meima aliba Asür Merangkaba Kumlong ward, akümüli tembangdang tembar adianutem, kija kibong aser telok; jila yimti balala nungi; Kiyonger aser yimer yimsanger kwikati ozü asüko lemsatepa sarasadem, rongsen, shisatsü aser nübu agi yaritepogo, nenok ajak dang ozüi pelaba lemsateper. Tongtipangsa item adianutem aser telok dang kanga pelar: -

1. Mr & Mrs Metsubu Jamir
2. Mr Miathou Krose, Chairman NHHDC
3. Mr Zakabo Rotokha MD, NHHDC
4. Mr Atsung Walling, SDO Civil Mangkolemba
5. Er. Moameren EE (Electrical Div, Mkg) and staff
6. Officers & Staff NHHDC
7. Mangkolemba Power Dept.
8. Staffs of Nagaland Emporium New Delhi
9. Kumlong Ward Yimden, Mkg
10. Kumlong Baptist Church, Mkg
11. Kumlong B/Church Youth Ministry
12. Chungliyimsen Union, Mkg
13. Chungliyimsen Putu Menden
14. Chungliyimsen Baptist Church
15. Chungliyimsen Fellowship Mkg
16. Chungliyimsen Senso Mesulim M/Roko
17. District Pensioners Association
18. Police Baptist Church Tuensang 3rd NAP Bat.
19. Dr. Kibang, Asst. CMO Mkg
20. Dr. Limayanger
21. Mr & Mrs Tinu Pongen Chummukedima
22. Mr & Mrs Imnawati Pongen Kumlong ward
23. Lt Supongshila Children & grandchildren
24. Lt Imnanichet Children & grandchildren
25. Lt Pangtinokcha Children & grandchildren
26. Mr & Mrs Tiatoshi Kumlong ward
27. Mr & Mrs Rongsen Jamir, Kumlong ward
28. Mr & Mrs Imnawati Kumlong ward
29. Mr & Mrs Toshimongba Kumlong Ward
30. Mr. Taliyanger Imchen Kumlong
31. Mr. Aochuba, Kumlong Ward
32. Mr & Mrs Limawati Jamir C/sen
33. Mr. Bendangnichet Pongen C/sen
34. Dr. Imliwabang Dimapur
35. Dr. Arenkaba Mkg

Ozüi nenok dangi jurisa-a tsüngdong arua tepela meshiteter, saka Tulusang Tsüngremi nenok ajak moajangma ta ozüi sarasademtsür.

- Temeim Kinungtsü, Jala Jabasotem, Semchirtem Anükapang aser Adianutem

PRESS RELEASE

We the following Executive members of BJP party from Lakhuni village under 30 Alongtaki Assembly Constituency have decided to withdraw our association from the BJP party unit at Lakuni village, as we have entirely lost all hopes and confidence in the leadership of Shri. Temjen Imna Along Longkumer, elected legislature from the 30 Alongtaki Assembly Constituency and State Party President, BJP Nagaland.

Our efforts of having tirelessly working for the welfare and interest of the party at Lakhuni Village, but were instead rewarded with false hope and vacuous promises by our leader and the functionaries of 30 Alongtaki Mandal. Therefore, we the following Executive members have unanimously resolved firmly that we shall no longer affiliate to seek party and its leadership.

Sl.No	Name	Designation	Signature
1	Wali toshi	Executive	<i>(Signature)</i>
2	Lamu akim	Executive	<i>(Signature)</i>
3	Lolen mongba	Executive	<i>(Signature)</i>
4	Sichea kiimba	Executive	<i>(Signature)</i>
5	Maalang	Member	<i>(Signature)</i>
6	Wati tamjen	Executive member	<i>(Signature)</i>

(Mangkolemba) wali
Date 24/2/2021

Motera nung stadium Narendra Modi tenung nung jatsü



Tir Ram Nath Kovind aser Union Home Minister Amit Shah nati India cricket captain Virat Kohli den Narendra Modi Cricket Stadium, Ahmedabad nung sensak asema noksa nung angur.

Tsüklai/February 24, 2021 (Agencies): Ahmedabad nung amenoka aliba Motera cricket stadium koba dang Sardar Patel Stadium ta jaa liasü iba stadium nungja ya Narendra Modi stadium ta melentsüogo. Iba stadium ya Bodhbarnü India aser England na tsüingda tasembuba Test asaya metenzük tsüingda tir Ram Nath Kovind-i lapoktsüogo.

Gujarat kübok Ahmedabad yimti nung amenoker aliba stadium nung nisung 1,10,000 asemsü, koba alima nung tulutiba asütsü. Ajisüka Covid-19 wara dak sendakba nung inyakyimtem temulungdang yur iba Test asaya reprangtsü atema nisung 55,000 nem dang temelaba agütsütsü. Küm ka tejakdang iba tesem nung PM

Modi aser US President Donald Trump na indang sentong ka ayongzüka agiogo.

Kasa mapang nung Union Minister for Youth Affairs and Sports Kiren Rijju-i, Motera Stadium ya tulutiba dang masü saka alima nung stadium rongnung tajungtiba ka lir, ta ashi. Test asaya metenzük tsüingda anogo ka jelia Rijju aser BCCI secretary Jay Shah nati stadium semdanga asadangogo aser world-class facilities tem inokja aliba agi temulung asüba lemsatapa liasü.

Stadium ya ali acres 63 nung sen crore 800 shi intoka yangluogo, kong asaya repranger 1,32,000 mentettsü aser Melbourne Cricket Ground ajatetogo, kong

terpranger 90,000 asemer.

"Ali ajak sentep nung Olympic size soccer fields 32 den kasa asütsü," ta Press Information Bureau sangdong ka ajanga metetdaksü.

Facility koba yanglushitsü atema 2015 küm shibang, iba stadium nung India nungeri alizüing aika tongtetogo. Iba stadium nung 1987 küm Pakistan den Test asayaba mapang run 10,000 atong aser 1994 küm Kapil Dev-i Test asaya nung wicket 432buba agi Sir Richard Hadlee ajateter alima nung wicket timtiba agiba asayar aküm.

Australian firm Populous, shirnoki Melbourne Cricket Stadium design süa liasü, parnoki iba stadium tasenba yangluba nunga shilem agiogo.

All England Open: Saina, Srikanth & Sindhu renemshir

Tsüklai/February 24, 2021 (Agencies): London Olympics bronze medallist Saina Nehwal aser taoba world no.1 asayar Kidambi Srikanth na taküm All England Championships mezüingbuba round nung asayar tajung den asayatsü ataogo.

Kasa mapang nung PV Sindhu, asayamung tetenzüklen tekübokba jenjang nung aliba asayarterm den asayatsü aser kokyonga tura Japan tsür Akane Yamaguchi aser Spanin tsür Olympic champion Carlota Marin den ajuruteptsü.

Saina mezüingbuba round nung Danish tsür Mia Blichfeldt den asayatsü, shibai January ita mezüingbuba Thailand Open nung Sindhu mezüingbuba round nung tsükdaksü. Tebur kija asaya nung Srikanth mezüingbuba asaya Indonesia nung asayar Tommy Sugiarto den asayatsü. Maneni World championships bronze medallist B Sai Praneeth France nung asayar Toma Junior Popov den asayatsü.

Sindhu shiba fifth seeded

asayar asütsü, la Malaysia tsür Soniia Cheah den mezüing asayatsü.

Tebur tarep asaya nung Satwiksairaj Rankireddy aser Chirag Shetty na France nung tarep Eloi Adam aser Julien Maio na den asayatsü aser tetsür tarep asaya nung Ashwini Ponnappa aser N Sikki Reddy na Thailand tsür Benyapa Aimsaard aser Nuntakarn Aimsaard na den asayatsü.

All England open nung India nung asayarterm fixture vamai alitsü:

Tetsür kija asaya:

PV Sindhu vs Soniia Cheah (Malaysia)

Saina Nehwal vs Mia Blichfeldt (Denmark)

Tebur kija asaya:

Kidambi Srikanth vs Tommy Sugiarto (Indonesia)

Parupalli Kashyap vs Kento Momota (Japan)

Lakshya Sen vs Kantaphon Wangcharoen (Thailand)

HS Prannoy vs Liew Daren (Malaysia)

Sameer Verma vs Ygor

Coelho (Brazil)

B Sai Praneeth vs Toma Junior Popov (France)

Tebur tarep asaya:

Satwiksairaj Rankireddy/Chirag Shetty vs Eloi Adam/Julien Maio (France)

MR Arjun/Dhruv Kapila vs Ong Yew Sin/Teo Ee Yi (Malaysia)

Tetsür tarep asaya:

Ashwini Ponnappa/ N Sikki Reddy vs Benyapa Aimsaard/ Nuntakarn Aimsaard (Thailand)

Meghana Jakkampudi/ Poorvisha Ram vs Alexandre Boje/Mette Poulsen (Denmark)

Ashwini Bhat/Shikha Gautam vs Chloe Birch/Lauren Smith (England)

Tarep temeyoktep asaya:

Dhruv Kapila/Meghana Jakkampudi vs Praveen Jordan/Melati Oktavianti (Indonesia)

Satwiksairaj Rankireddy/ Ashwini Ponnappa vs Yuki Kaneko/Misaki Matsutomo (Japan)

Pranaav Jerry Chopra/ N Sikki Reddy vs Max Flynn/ Jessica Pugh (England).

Flying Rabbits-i T-20 Cricket asayamung kokogo

Dimapur, Tsüklai/February 24 (TYO): Nagamese Baptist Fellowship (NBF) Sports Ministry Chumkedima Village-i ayongzüka Ibuba Champions Trophy T-20 Cricket Tournament Flying Rabbits-i kokogo.

Bodhbarnü final asaya nung Flying Rabbits CC-i wicket 3 agi Police Baptist Church Chumkedima akok.

Toss akokba sülen Police Baptist Church Chumkedima-i mezüing bat asütsü shim aser parnoki over 20 nung asayar 3 out ser run 199 yanglu, koba Rabbits puri over 18.2 nung asayar 7 out ser menepa asaya akok. Final asaya nung Nayan nem man of the match award agütsü. Pai run 28 yanglua liasü.

Asayamung akoker Flying

Rabbits nem senpet sen 50,000 den takok marok agütsü aser runners-up Police Baptist Church Chumkedima nem senpet sen 25,000 den takok marok agütsü.

Jurila sempet agizükertem:

Fair Play Team: BSCT

Kushiabill, Best Wicket Keeper: Suraj Mech; BSCT Kushiabill, Highest Wicket Taker: Gopilal; BSCT Kushiabill, Highest run scorer - Jitu; Police Baptist Church Chumkedima, Player of the Tournament: Viketuolie Solo; Diphupar CC. Parnok ajak nem senpet agütsüogo.

Tanü asayamung shibangba sentong nung Grace Salvation Nagamese Church, Kuda village, Dimapur Pastor Moses Basena alakteta jaoker liasü aser pai senpettem lemtsü.

Gari tsükokba sülen Tiger Woods golf career mejangjai kümogo



Washington, Tsüklai/February 24 (Agencies): Mongolbarnü gari tsükokba lendong nung kanga mejungi yiruba sülen golf asaya nung takok tulu ngua asayaa arur Tiger Woods career mejangjai kümogo.

Arishi küm 45 tain America nung asayar ya Los Angeles anasa anepdang züingia gari tsükokba lendong nung densemba sülen tetsüing yirua surgery aika agiogo.

Woods-i tang tashi nung major titles 15 bena lir, koba Jack Nicklaus-i otsü yanglur aliba meneptsü asem dang nungdaker aser US PGA crowns 82 koka Sam Snead den iba asayamung timtiba akoker rongnung jenjang kasa nung aliba ya iba lendong ajanga tembangtsü akok.

Kasa mapang nung pa career nung timtema aika ajangshiogo. Pa teperem aser temekok surgery aiben agiba den 2009 küm tanga tetsür den medemba atema yimjak nung maksüa tatok meshitsüsa akümba den kinungtsü Elin Nordegren den bala aser ano 2017 küma gari mashi mashi anishiba atema pua liasü.

2017 küm teperem surgery agiba sülen pa temesepba chiyongtsü chiajemer gari aniba atema apu. Pai, pa nem agütsüba mozü agi pa temang nung koda kongshitsü aji mejangjai liasü, ta ashiba den gari mashi mashi anishiba atema tatok meshi.

1990s nung NBA nung nungtugu asayar Michael Jordan den Woods kanga nungtugu aküm. Tena ya iba mapang alima nung ajaki rangketa reprangba asayar aser takartiba rongnung densemba liasü. Pa golf meimer mesera saisapong meimertemi dang masü saka nisung aikati kanga sakloka liasü.

Woods ya tanak nisungtem rongnung Masters akokba asayar mezüingbuba liasü. Pai 1997 küm iba asayamung mezüingbuba akok.

Mepetmesü aika ajangshia arur pai 2019 küm Augusta National nungsa 2008 küm sülen mezüingbuba Masters asayamung akok.

Woods shibai otsü tasen ka yanglua world number one jenjang nung hopta 683 liasü, pa iba hopta world rankings nung jenjang 50buba nung lir.

BILEM DANGANG

"Nisung ajakbo mapang peria magütsütettsü; langa alir nem agüjang."